

الْحَمْدُ لِلَّهِ الْقَائِلِ: وَنَضَعُ الْمَوَازِينَ الْقِسْطَ لِيَوْمِ الْقِيَمَةِ فَلَا تُظْلَمُ نَفْسٌ شَيْئًا ^صوَإِنْ
كَانَ مِثْقَالَ حَبَّةٍ مِّنْ خَرْدَلٍ أَتَيْنَا بِهَا ^قوَكُفَىٰ بِنَا حَسِيبِينَ ﴿٤٧﴾

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.

أَمَّا بَعْدُ، فَيَا أَيُّهَا الْمُسْلِمُونَ، اتَّقُوا اللَّهَ، أَوْصِيكُمْ وَآيَايَ بِتَقْوَى اللَّهِ فَقَدْ فَازَ الْمُتَّقُونَ.
قَالَ اللَّهُ تَعَالَى: يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ

مُسْلِمُونَ ﴿١٠٢﴾

MUSLIMIN YANG DIRAHMATI ALLAH SWT SEKALIAN,

Saya berpesan kepada diri saya dan para jemaah agar bertakwa kepada Allah **سُبْحَانَهُ وَتَعَالَى** dengan melaksanakan segala perintah-Nya dan meninggalkan segala larangan-Nya. Mudah-mudahan kita menjadi hamba Allah **سُبْحَانَهُ وَتَعَالَى** yang diredhai di dunia dan di akhirat.

Sebelum melanjutkan bicara, marilah kita memberikan sepenuh tumpuan kepada isi kandungan khutbah hari ini. Jangan berbual-bual, tidur dengan sengaja, bermain telefon bimbit dan menggerakkan tabung kutipan Jumaat kerana ia bertentangan dengan sunnah serta adab. Pada hari yang mulia ini mimbar akan membicarakan khutbah bertajuk:

“ISLAM AGAMA KASIH SAYANG.”

HADIRIN SIDANG JUMAAT SEKALIAN,

Islam sebagai agama berkasih sayang yang memberi rahmat kepada seluruh alam. Rahmat atau kasih sayang dalam Islam meliputi sekalian makhluk, ia tidak hanya terbatas kepada manusia bahkan menjangkau kepada haiwan, tumbuhan dan sekalian alam. Islam merupakan agama yang memerintahkan penganutnya untuk saling mengasihi dan menyayangi sesama makhluk. Hadis daripada Abdullah bin Amr رَضِيَ اللَّهُ عَنْهُمَا bahawa Rasulullah صَلَّى اللَّهُ عَلَيْهِ وَسَلَّمَ bersabda:

الرَّاحِمُونَ يَرْحَمُهُمُ الرَّحْمَنُ، إِرْحَمُوا مَنْ فِي الْأَرْضِ يَرْحَمَكُم مَّن فِي السَّمَاءِ

Maksudnya: *“Orang-orang yang penyayang itu dikasihi (Allah) Yang Maha Penyayang. Kasihilah mereka yang berada di bumi, nescaya kamu akan dikasihi oleh yang berada di langit.”*

(Hadis Riwayat at-Tirmizi).

Syeikh Nawawi al-Bantani dalam kitabnya *Nasa'ih 'Ibad* (نَصَائِحُ الْعِبَاد) sewaktu menghuraikan hadis tersebut menyatakan bahawa orang-orang yang penyayang kepada makhluk yang ada di bumi iaitu manusia dan haiwan. Beliau menyarankan agar menyayangi semua makhluk Allah سُبْحَانَهُ وَتَعَالَى mengikut kadar kemampuan yang ada walaupun terhadap makhluk yang tidak berakal serta mendoakan agar diperoleh limpahan rahmat dan keampunan Allah سُبْحَانَهُ وَتَعَالَى. Dengan itu, kita akan mendapatkan kasih sayang daripada penduduk langit iaitu para malaikat yang mana jumlahnya melebihi penduduk bumi.

Al-Mubarakfuri menukilkan dalam kitab *Tuhfat al-Ahwazi* (تُحْفَةُ الْأَحْوَزِيِّ) terhadap hadis yang sama bahawa beliau menyatakan lafaz

'makhluk yang ada di bumi' iaitu (مَنْ فِي الْأَرْضِ) meliputi semua jenis makhluk. Maka berkasih sayanglah kepada orang yang baik mahupun kepada yang tidak bermoral (*fajir*), orang yang berakal atau pun juga kepada orang yang jahil dan kepada binatang liar atau burung.

HADIRIN YANG DIKASIHI ALLAH SWT SEKALIAN,

Berkasih sayang atau berbuat baik terhadap haiwan adalah ibadah kepada Allah سُبْحَانَهُ وَتَعَالَى. Bahkan ia boleh menjadi sebab kepada pengampunan dosa dan peningkatan darjat di sisi Allah سُبْحَانَهُ وَتَعَالَى.

Dalam sebuah hadis riwayat Abu Hurairah رَضِيَ اللَّهُ عَنْهُ bahawa Rasulullah صَلَّى اللَّهُ عَلَيْهِ وَسَلَّمَ menceritakan kisah seorang lelaki yang kehausan lalu turun ke perigi untuk mendapatkan air. Ketika keluar dari perigi tersebut, dilihatnya seekor anjing menjelirkan lidah sambil menjilat-jilat tanah dalam kehausan. Kasihan terhadap haiwan tersebut lelaki tadi turun kembali mengisi air dengan kasutnya kemudian digigit lalu dibawa naik ke atas dan diberikan anjing itu minum. Usaha murni yang dibuat oleh lelaki itu menyebabkan dosanya diampunkan. Bahkan dalam riwayat Abdullah bin Dinar serta Ibn Hibban menyatakan lelaki tersebut dimasukkan ke dalam syurga kerana usahanya. Para sahabat yang mendengar kisah ini telah bertanya kepada Rasulullah صَلَّى اللَّهُ عَلَيْهِ وَسَلَّمَ:

يَا رَسُولَ اللَّهِ وَإِنَّ لَنَا فِي الْبَهَائِمِ أَجْرًا؟ قَالَ نَعَمْ فِي كُلِّ رَطْبَةٍ أَجْرٌ

Maksudnya: “Wahai Rasulullah, apakah kami mendapat pahala dengan berbuat baik kepada haiwan?” Baginda ﷺ menjawab: “Benar, bagi setiap hati yang basah (bersikap rahmah) ada pahalanya.”

(Hadis Riwayat al-Bukhari)

Sebaliknya, siapa yang tidak berbuat baik terhadap haiwan serta menzaliminya boleh menjadi sebab kepada kemurkaan Allah **سُبْحَانَهُ وَتَعَالَى** dan dimasukkan ke dalam neraka. Sebuah hadis riwayat al-Bukhari daripada Abdullah bin Umar **رَضِيَ اللَّهُ عَنْهُ** bahawa Rasulullah **صَلَّى اللَّهُ عَلَيْهِ وَسَلَّمَ** menceritakan tentang seorang wanita dimasukkan ke dalam neraka kerana menambat seekor kucing tanpa diberikan makanan dan minuman serta tidak melepaskannya untuk mencari makanan.

HADIRIN YANG DIRAHMATI ALLAH سُبْحَانَهُ وَتَعَالَى SEKALIAN,

Penguatkuasaan Akta Kebajikan Haiwan 2015 (Akta 772) yang mengenakan hukuman keras termasuk penjara kepada yang bersalah menzalimi haiwan di negara ini masih lagi dilihat belum berjaya membendung penganiayaan terhadap haiwan. Merujuk kepada data Jabatan Perkhidmatan Veterinar Pulau Pinang daripada tahun 2019 sehingga tahun 2023, terdapat peningkatan aduan berkaitan kebajikan dan penganiayaan ke atas haiwan.

Ia melibatkan 101 aduan pada tahun 2019, 110 aduan pada tahun 2020 dan 142 aduan pada tahun 2021. Manakala pada tahun 2022 mencatatkan 176 aduan dan sehingga 8 Ogos 2023 sebanyak 169 aduan telah diterima. Daripada sudut positifnya, peningkatan aduan ini menunjukkan bahawa terdapat kesedaran berkaitan haiwan di kalangan penduduk di Negeri Pulau Pinang namun masih ramai lagi masyarakat yang tidak sedar akan sifat sayangkan haiwan ini. Antara kes kezaliman terhadap haiwan yang dilaporkan di negeri Pulau Pinang adalah seperti berikut:

Kes Pertama: Pada Februari 2019, seorang lelaki meninggalkan kucing tanpa makan dan minum sehingga menyebabkan kematian telah dikenakan hukuman penjara 7 hari di bawah Seksyen 294 Kanun Tatacara Jenayah.

Kes Kedua: Pada Mac 2020, seorang lelaki telah melakukan penganiayaan ke atas anjing miliknya dengan cara memukul dan mencampak ke dinding batu dan dikenakan hukuman Bon berkelakuan baik selama setahun dengan seorang penjamin dan wang jaminan sebanyak RM1,000.00.

Kes Ketiga: Pada Julai 2020, seorang wanita cuai hingga menyebabkan penderitaan yang tidak wajar ke atas 3 ekor anjing dalam jagaannya. 1 bangkai dan 2 set serpihan tulang turut ditemui dan disyaki mati sebab dianiaya dan dikenakan hukuman denda RM30,000.00 atau penjara 8 bulan; dan

Kes Keempat: Pada Disember 2020, tular seorang wanita memukul 2 ekor kucing dengan sebatang besi hingga 1 ekor kucing bunting mati dan satu ekor anak kucing cedera pada bahagian muka dan dikenakan denda RM30,000.00 atau 6 bulan penjara;

MUSLIMIN YANG DIRAHMATI ALLAH SEKALIAN,

Kes-kes tersebut adalah antara contoh kes berkaitan kezaliman ke atas haiwan kesayangan. Walaubagaimanapun terdapat kezaliman yang dilakukan terhadap haiwan liar seperti memerang dipukul di bahagian kepala dan diikat hingga mati kerana mencuri ikan dan monyet dcederakan serta diracun hingga mati. Kezaliman terhadap haiwan berlaku apabila haiwan tersebut dcederakan dengan sengaja dengan apa jua perbuatan seperti menyepak, menendang atau memukul.

Selain kezaliman, penganiayaan ke atas haiwan juga berlaku apabila kebajikan haiwan tersebut tidak dijaga dengan tidak memberikan makan dan minum, tidak mendapatkan rawatan apabila sakit, ditinggalkan oleh pemilik yang berpindah, kurungan kotor, diikat dengan rantai yang pendek dan terdedah kepada panas serta hujan.

KAUM MUSLIMIN YANG BERBAHAGIA,

Sesungguhnya Islam telah menerapkan konsep ihsan, berbuat baik dan berkasih sayang dalam kehidupan terhadap sekalian makhluk. Umat Islam sejak pengutusan Rasulullah ﷺ yang disifatkan rahmat kepada sekalian alam telah bekerja ke arah membela hak asasi manusia dan haiwan yang telah dicabuli dengan pelbagai jenis pelanggaran seperti kehambaan, kezaliman, pembunuhan dan sebagainya. Sebuah hadis yang diriwayatkan oleh Abu Dzar al-Ghifari رَضِيَ اللَّهُ عَنْهُ, Rasulullah ﷺ bersabda bahawa Allah سُبْحَانَهُ وَتَعَالَى berfirman:

يَا عِبَادِي إِنِّي حَرَّمْتُ الظُّلْمَ عَلَى نَفْسِي وَجَعَلْتُهُ بَيْنَكُمْ مُحَرَّمًا فَلَا تَظَالَمُوا...

Maksudnya: “Wahai hamba-hamba-Ku, Aku telah haramkan bagiku kezaliman dan Aku juga telah menjadikannya haram dalam kalangan kamu. Maka janganlah kamu saling menzalimi....”

(Hadis Riwayat Muslim).

HADIRIN YANG DIMULIAKAN,

Mengakhiri khutbah, marilah kita sama-sama menghayati dan mengambil pengajaran seperti berikut:

1. Umat Islam hendaklah mengetahui bahawa Islam adalah agama yang membawa rahmat kepada seluruh makhluk sama ada manusia, haiwan, tumbuh-tumbuhan dan sekalian alam.
2. Umat Islam hendaklah memahami bahawa berkasih sayang atau berbuat baik terhadap haiwan adalah ibadah yang boleh mengundang keredaan dan pengabaian terhadapnya boleh mengundang kemurkaan Allah **سُبْحَانَهُ وَتَعَالَى**.
3. Umat Islam hendaklah menyedari bahawa isu kezaliman dan penganiayaan terhadap haiwan dapat dibanteras dengan memupuk perasaan ihsan serta mewujudkan kesedaran dalam masyarakat.

Firman Allah dalam Surah al-An'am ayat 38:

أَعُوذُ بِاللَّهِ مِنَ الشَّيْطَانِ الرَّجِيمِ

وَمَا مِنْ دَابَّةٍ فِي الْأَرْضِ وَلَا طَيْرٍ يَطِيرُ بِجَنَاحَيْهِ إِلَّا أُمَمٌ أَمْثَالُكُمْ مَا فَرَّطْنَا فِي الْكِتَابِ مِنْ شَيْءٍ ثُمَّ إِلَىٰ رَبِّهِمْ يُحْشَرُونَ ﴿٣٨﴾

Maksudnya: “Dan tidak seekor pun binatang yang melata di bumi, dan tidak seekor pun burung yang terbang dengan kedua sayapnya, melainkan mereka umat-umat seperti kamu. Tiada Kami tinggalkan sesuatu pun di dalam kitab Al-Quran ini; kemudian mereka semuanya akan dihimpunkan kepada Tuhan mereka (untuk dihisab dan menerima balasan).”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ،
أَقُولُ مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ،
فَأَسْتَغْفِرُوهُ، إِنَّهُ هُوَ الْغَفُورُ الرَّحِيمُ.